

**Gipuzkoako
Aldizkari
Ofiziala**



**Boletín
Oficial de
Gipuzkoa**

190

2021eko urriaren 4a, astelehena

1

GIPUZKOAKO LURRALDE HISTORIKOKO XEDAPEN OROKORRAK

GIPUZKOAKO FORU ALDUNDIA

OGASUN ETA FINANTZA DEPARTAMENTUA

11/2021 Foru Dekretua, irailaren 29koa, ondare eskualdaketen eta egintza juridiko dokumentatuen gaineko zergaren, oinordetza eta dohaintzen gaineko zergaren eta sozietateen gaineko zergaren erregelamenduak aldatzen dituena.

Foru dekretu honek hainbat aldaketa sartzen ditu erregelamendu hauetan: martxoaren 22ko 9/2011 Foru Dekretuaz onartutako Gipuzkoako Lurralde Historikoko Ondare Eskualdaketen eta Egintza Juridiko Dokumentatuen gaineko Zergaren Erregelamendua, urriaren 22ko 42/2012 Foru Dekretuaz onartutako Oinordetza eta Dohaintzen gaineko Zergaren Erregelamendua eta ekainaren 16ko 17/2015 Foru Dekretuaz onetsitako Sozietateen gaineko Zergaren Erregelamendua. Aldaketen helburua da foru arau jakin batzuen erregelamenduzko garapenaren edukia moldatzea, zehazki 2019. urterako zerga neurriak onartzen dituen otsailaren 11ko 3/2019 Foru Arauak eta 2021. urterako zerga aldaketa jakin batzuk onesten dituen apirilaren 15eko 3/2021 Foru Arauak erregelamendu horien xedapenetan egindako aldaketetara.

Foru dekretuak hiru artikuluko eta azken xedapen bakarra ditu.

Ondare eskualdaketen eta egintza juridiko dokumentatuen gaineko zergaren eta oinordetzen eta dohaintzen gaineko zergaren esparruan, 1. eta 2. artikuluen bidez autolikidazio epea aldatzen da, betiere oinordetzen eta dohaintzen gaineko zergaren autolikidazioa aurkezteko epeak izan duen aldaketarekin koherentzia mantentzeko, «mortis causa» eskurapenetan eta gozamenaren heriotzaren zain dauden gozamen eskurapenak direnean. Aldaketa hori 2019. urterako zerga neurri jakin batzuk onartzen dituen otsailaren 11ko 3/2019 Foru Arauaren 4. artikuluko hiru. apartatuak sartu zuen urtarrilaren 11ko 3/1990 Foru Arauan, Oinordetzen eta Dohaintzen gaineko Zergari buruzkoan.

Sozietateen gaineko zergari dagokionez, 3. artikuluen bidez lehen aipatutako erregelamenduaren 32 bis.3 artikuluko b) letraren edukia egokitzen da entitate sortu berriztat azken zazpi urteetan eratutakoa hartu dadin, betiere 2021. urterako zerga

aldaketa jakin batzuk onartzen dituen Foru Arauaren 1. artikuluko hirugarren ordinalaren hamaikagarren apartatuak egindako aldaketan aurreikusitakoaren haritik, eta Gipuzkoako Lurralde Historikoko Pertsona Fisikoen Errentaren gaineko Zergari buruzko urtarrilaren 17ko 3/2014 Foru Arauaren 89 ter.1 artikuluekin lotuta.

Azken xedapen bakarrean foru dekretua noiz jartzen den indarrean xedatzen da.

Horrenbestez, Ogasun eta Finantza Departamentuko foru diputatuak proposaturik, Lege Aholkularitzako Batzordearekin bat etorritz, eta Diputatuen Kontseiluak gaurko bileran eztabaidatu eta onartu ondoren, honako hau

XEDATZEN DUT

1. artikulua. Aldatzea martxoaren 22ko 9/2011 Foru Dekretuaz onartutako Gipuzkoako Lurralde Historikoko Ondare Eskualdaketen eta Egintza Juridiko Dokumentatuen gaineko Zergaren Erregelamendua.

Aldatu egiten da martxoaren 22ko 9/2011 Foru Dekretuaz onartutako Gipuzkoako Lurralde Historikoko Ondare Eskualdaketen eta Egintza Juridiko Dokumentatuen gaineko Zergaren Erregelamenduko 36. artikulua 2. apartatuko 1. arau berezia. Honela idatzita gelditzen da:

«1.a. Titularra hil delako sortzen diren gozamen azkentzei buruzko autolikidazioak aurkezteko epea urtebetekoa izango da, gozamenduna hiltzen den egunaren biharamunetik aurrera. Berdin dio testamentu eragiketak formalizatu diren edo ez, eta berdin dio noiz egin diren.»

2. artikulua. Aldatzea urriaren 22ko 42/2012 Foru Dekretuaz onartutako Oinordetza eta Dohaintzen gaineko Zergaren Erregelamendua.

Aldatu egiten da urriaren 22ko 42/2012 Foru Dekretuaz onartutako Oinordetza eta Dohaintzen gaineko Zergaren Erregelamenduko 40. artikulua a) letra. Honela idatzita gelditzen da:

«a) «Mortis causa» eskurapenetan, eta bizitza aseguruaren kontratuetan onuradun diren kasuan, epea urtebetekoa izango da, kausatzailearen heriotza egunetik aurrera edo heriotzaren deklarazioak irmotasuna hartzen duenetik aurrera.

Epe hori bera aplikatuko da gozamendunaren heriotzaren zain dauden gozamen eskurapenetan, jabaria «inter vivos» egintza bidez zatibanatua egon arren.»

3. artikulua. Aldatzea ekainaren 16ko 17/2015 Foru Dekretuaz onetsitako Sozietateen gaineko Zergaren Erregelamendua.

Aldatu egiten da ekainaren 16ko 17/2015 Foru Dekretuaz onetsitako Sozietateen gaineko Zergaren Erregelamenduko 32 bis artikulua 3. apartatuko b) letra. Honela idatzita gelditzen da:

«b) Berrikuntzari dagokionez, entitate partaidetua berria edo sortu berria denean. Beharkizun hau betetzen dela ulertuko da entitatea eratu denetik zazpi urte baino gutxiago igaro direnean.»

Azken xedapen bakarra. Indarrean jartzea.

Foru dekretu hau Gipuzkoako ALDIZKARI OFIZIALEAN argitaratu eta biharamunean jarriko da indarrean.

Donostia, 2021eko irailaren 29a.

DIPUTATU NAGUSIA,
Markel Olano Arrese.

OGASUN ETA FINANTZA
DEPARTAMENTUKO
FORU DIPUTATUA,
Jokin Perona Lerchundi. (6363)